

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১১/২০১৭

ঢাকা, মঙ্গলবার ৬ জুন ২০১৭, ২৩ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। মেয়াদ বাড়ানোর সঙ্গে দ্রুত বিচার আইনে সাজা বাড়ছে : মন্ত্রিসভায় সংশোধন প্রস্তাব অনুমোদন
- ২। রূপপুর পারমাণবিক কেন্দ্রে ব্যবহৃত বর্জ্য ফেরত নেবে রাশিয়া : মন্ত্রিসভায় চুক্তির খসড়া অনুমোদন
- ৩। প্রধান বিচারপতির ইফতারে রাষ্ট্রপতির যোগদান
- ৪। আমদানি-রফতানি সম্পর্ক থাকা ১৯৮টি দেশের মধ্যে ৭১ দেশের সঙ্গে বাংলাদেশের বাণিজ্য ঘাটতি : সংসদে বাণিজ্যমন্ত্রী
- ৫। দেশের অর্থনীতি চলছে ইতিবাচক ধারায় : কৃষিমন্ত্রী
- ৬। বিদেশ থেকে ৬ লাখ মেট্রিক টন চাল আমদানি করা হচ্ছে : খাদ্যমন্ত্রী
- ৭। রেলের উন্নয়নে ৫৩টি প্রকল্প চলমান রয়েছে : সংসদে রেলমন্ত্রী
- ৮। মুক্তিযোদ্ধা আবদুল জব্বার ও সাবেক সংসদ সদস্য আবুল হাসেমের চিকিৎসা ব্যয় বহন করবে সরকার : স্বাস্থ্যমন্ত্রী
- ৯। ৫ টাকার নতুন নোট ইস্যু আজ
- ১০। বাংলাদেশি পর্যটকদের ভারতে যাতায়াত সহজ করা হয়েছে
- ১১। রাজধানীর শপিংমলে বিশেষ নিরাপত্তায় ডিএমপি

১। মেয়াদ বাড়ানোর সঙ্গে দ্রুত বিচার আইনে সাজা বাড়ছে : মন্ত্রিসভায় সংশোধন প্রস্তাব অনুমোদন

আইন-শৃঙ্খলা বিঘ্নকারী অপরাধের সর্বোচ্চ সাজা ৫ বছর থেকে বাড়িয়ে ৭ বছর করা হচ্ছে। সর্বনিম্ন ২ বছরের সাজা ও অর্থদণ্ড বা উভয়দণ্ডের বিধানও থাকছে। মন্ত্রিসভায় এ সংক্রান্ত ‘আইন-শৃঙ্খলা বিঘ্নকারী অপরাধ (দ্রুত বিচার) (সংশোধন) আইন-২০১৭’ এর খসড়া অনুমোদন দেওয়া হয়। জাতীয় সংসদে গতকাল ৫ জুন সোমবার প্রধানমন্ত্রী শেখ হাসিনার সভাপতিত্বে মন্ত্রিসভার নিয়মিত বৈঠকে এ অনুমোদন দেওয়া হয়। মন্ত্রিপরিষদ সচিব মোহাম্মদ শফিউল আলম বলেন, দ্রুত বিচার আইনের ৪(১) ধারা সংশোধন করে শাস্তির মেয়াদ বাড়ানোর প্রস্তাব মন্ত্রিসভা অনুমোদন করেছে। এ আইনে ১২০ দিনের মধ্যে বিচারকাজ নিষ্পত্তির বিধান আছে। এই সময়ের মধ্যে নিষ্পত্তি করা না গেলে আরো ৬০ দিন সময় পাওয়া যাবে। সূত্র-ইত্তেফাক (পৃ. ১, ক. ৫) সংবাদ (শেষ. পৃ, ক. ৪) এশিয়ান এজ (শেষ. পৃ, ক. ৩) ডেইলি সান (শেষ. পৃ, ক. ৮)।

২। রূপপুর পারমাণবিক কেন্দ্রে ব্যবহৃত বর্জ্য ফেরত নেবে রাশিয়া : মন্ত্রিসভায় চুক্তির খসড়া অনুমোদন

রাশিয়া রূপপুর পারমাণবিক বিদ্যুৎকেন্দ্রের তেজস্ক্রিয় ব্যবহৃত জ্বালানি বর্জ্য (স্পেন্ট ফুয়েল) ফেরত নেবে। এজন্য এ সংক্রান্ত একটি চুক্তির খসড়া অনুমোদন করেছে মন্ত্রিসভা। জাতীয় সংসদ ভবনে কেবিনেট কক্ষে গতকাল ৫ জুন সোমবার প্রধানমন্ত্রী শেখ হাসিনার সভাপতিত্বে অনুষ্ঠিত মন্ত্রিসভার বৈঠকে বাংলাদেশ ও রাশিয়ার মধ্যে স্বাক্ষরের জন্য ‘কো-অপারেশন কনসার্নিং রিটার্ন অফ স্পেন্ট নিউক্লিয়ার ফুয়েল ফ্রম রূপপুর পাওয়ার প্ল্যান্ট টু দ্যা রাশান ফেডারেশন’ এর খসড়া অনুমোদন দেওয়া হয়। সূত্র-সংবাদ (শেষ. পৃ, ক. ২) অবজারভার (পৃ. ১, ক. ১)।

৩। প্রধান বিচারপতির ইফতারে রাষ্ট্রপতির যোগদান

রাষ্ট্রপতি মো. আবদুল হামিদ সোমবার সুপ্রিমকোর্ট প্রাঙ্গণে প্রধান বিচারপতি সুরেন্দ্র কুমার সিনহা আয়োজিত ইফতার মাহফিলে যোগদান করেন। রাষ্ট্রপতি ঘুরে ঘুরে বিভিন্ন টেবিলের সামনে যান এবং অতিথিদের সঙ্গে কুশল বিনিময় করেন। ইফতারের আগে দেশ ও জাতির উত্তরোত্তর শান্তি, অগ্রগতি ও সমৃদ্ধি কামনা করে বিশেষ মোনাজাত করা হয়। সূত্র-জনকণ্ঠ (পৃ. ১, ক. ৩) ইত্তেফাক (পৃ. ১, ক. ১) নিউজ টুডে (শেষ.পৃ, ক. ১) এশিয়ান এজ (পৃ. ৩, ক. ১)।

৪। আমদানি-রফতানি সম্পর্ক থাকা ১৯৮টি দেশের মধ্যে ৭১ দেশের সঙ্গে

বাংলাদেশের বাণিজ্য ঘাটতি : সংসদে বাণিজ্যমন্ত্রী

চলতি অর্থবছরে (২০১৬-১৭) বাণিজ্য ঘাটতির পরিমাণ ৬ হাজার ৬২৫ মিলিয়ন মার্কিন ডলার। বিশ্বের প্রায় ১৯৮টি দেশের সঙ্গে বাংলাদেশের বাণিজ্যিক সম্পর্ক রয়েছে। চলতি অর্থবছরে ১৯৫টি দেশের সঙ্গে আমদানি-রফতানি বাণিজ্য হয়েছে। গতকাল ৫ জুন সোমবার জাতীয় সংসদ অধিবেশনে টেবিলে উত্থাপিত প্রশ্নোত্তর পর্বে বাণিজ্যমন্ত্রী তোফায়েল আহমেদ এ তথ্য জানান। তিনি বলেন, আমদানি-রফতানি সম্পর্ক থাকা ১৯৮টি দেশের মধ্যে ৭১টি দেশের সঙ্গে বাণিজ্য ঘাটতি রয়েছে। সূত্র-জনকণ্ঠ (পৃ. ১, ক. ১) ইনকিলাব (পৃ. ৮, ক. ৫) ইন্ডিপেনডেন্ট (পৃ. ৯, ক. ১)।

৫। দেশের অর্থনীতি চলছে ইতিবাচক ধারায় : কৃষিমন্ত্রী

সম্পদের সঠিক ব্যবহারের ফলে দেশের অর্থনীতি ইতিবাচক ধারায় পরিচালিত হচ্ছে বলে জানিয়েছেন কৃষিমন্ত্রী মতিয়া চৌধুরী। তিনি বলেন, সরকারের এই ধারা অব্যাহত থাকলে দেশকে ২০২১ সালের মধ্যে একটি মধ্যম আয় এবং ২০৪১ সালের মধ্যে উন্নত সমৃদ্ধ দেশে পরিণত করা সম্ভব। চলতি অর্থবছরের বাজেটে মোট বরাদ্দ ৩ লাখ ৪০ হাজার ৬০৫ কোটি টাকার মধ্যে ৩ লাখ ১৭ হাজার ৩৭৪ কোটি টাকা খরচ হয়েছে। গতকাল ৫ জুন সোমবার জাতীয় সংসদে ২০১৬-১৭ অর্থবছরের সম্পূরক বাজেটের ওপর সাধারণ আলোচনায় অংশ নিয়ে তিনি এ মন্তব্য করেন। সূত্র-সংবাদ (শেষ. পৃ, ক. ৩) ইত্তেফাক (পৃ. ৩, ক. ৫) নিউজ টুডে (শেষ. পৃ, ক. ২) ইন্ডিপেনডেন্ট (পৃ. ১২, ক. ৬)।

৬। বিদেশ থেকে ৬ লাখ মেট্রিক টন চাল আমদানি করা হচ্ছে : খাদ্যমন্ত্রী

দেশে বর্তমানে গত বছরের এ সময়ের তুলনায় চালের মজুদ কিছুটা কম রয়েছে। হাওর অঞ্চলে অকাল বন্যার কারণে যে ফসলহানি হয়েছে তা পূরণ করা এবং দেশে চালের মজুদ সন্তোষজনক পর্যায়ে রাখার লক্ষ্যে সরকার ইতোমধ্যে বিদেশ হতে ৬ লাখ মেট্রিক টন চাল আমদানির পরিকল্পনা গ্রহণ করেছে। গতকাল ৫ জুন সোমবার জাতীয় সংসদের টেবিলে উত্থাপিত প্রশ্নোত্তর পর্বে খাদ্যমন্ত্রী অ্যাডভোকেট কামরুল ইসলাম এ তথ্য জানান। সূত্র-জনকণ্ঠ (পৃ. ১, ক. ৮) ইত্তেফাক (পৃ. ৩, ক. ৬)।

৭। রেলের উন্নয়নে ৫৩টি প্রকল্প চলমান রয়েছে : সংসদে রেলমন্ত্রী

রেলপথমন্ত্রী মো. মুজিবুল হক বলেছেন, বর্তমানে বাংলাদেশ রেলওয়েতে ৯৭ হাজার ৬২৩ কোটি টাকা ব্যয়ে মোট ৫৩টি প্রকল্প চলমান রয়েছে। ৫৩টি প্রকল্পের অনুকূলে ২০১৬-১৭ অর্থবছরের সংশোধিত বার্ষিক উন্নয়ন কর্মসূচিতে (আরএডিপি) নয় হাজার ২৭৮ কোটি টাকা বরাদ্দ দেওয়া হয়েছে। প্রকল্পগুলোর কাজ দ্রুত বাস্তবায়ন হচ্ছে। ফলে বাংলাদেশ রেলওয়ে আরও আধুনিক হচ্ছে। গতকাল ৫ জুন সোমবার জাতীয় সংসদে মন্ত্রী এসব কথা বলেন। সূত্র-ইনকিলাব(শেষ. পৃ, ক. ২)।

৮। মুক্তিযোদ্ধা আবদুল জব্বার ও সাবেক সংসদ সদস্য আবুল হাসেমের

চিকিৎসা ব্যয় বহন করবে সরকার : স্বাস্থ্যমন্ত্রী

বীর মুক্তিযোদ্ধা স্বাধীন বাংলা বেতার কেন্দ্রের শিল্পী আবদুল জব্বার এবং ময়মনসিংহের গফরগাঁও থেকে নির্বাচিত সাবেক সংসদ সদস্য আবুল হাসেমের চিকিৎসার ব্যয় সরকার বহন করবে বলে ঘোষণা দিয়েছেন স্বাস্থ্য ও পরিবার কল্যাণমন্ত্রী মোহাম্মদ নাসিম। গতকাল ৫ জুন সোমবার বঙ্গবন্ধু শেখ মুজিব মেডিকেল বিশ্ববিদ্যালয় হাসপাতালে (বিএসএমএমইউ) চিকিৎসাধীন এ দু'জনকে দেখতে গিয়ে তিনি এ ঘোষণা দেন। সূত্র-যুগান্তর (পৃ. ৩, ক. ৮) ইত্তেফাক (শেষ. পৃ, ক. ৫) নিউজ টুডে (পৃ. ৩, ক. ৪) ডেইলি স্টার (পৃ. ৫, ক. ৬)।

৯। ৫ টাকার নতুন নোট ইস্যু আজ

সরকার ৫ টাকা মূল্যমানের নতুন কারেন্সি নোট ইস্যু করতে যাচ্ছে। আজ ৬ জুন মঙ্গলবার বাংলাদেশ ব্যাংকের মতিঝিল শাখা থেকে এটি ইস্যু করা হবে। কেন্দ্রীয় ব্যাংকের অন্যান্য শাখায়ও পরে নোটটি পাওয়া যাবে। নোটটিতে সিনিয়র অর্থ সচিব হেদায়েতুল্লাহ আল মামুনের স্বাক্ষর থাকছে। নোটটির সামনের অংশে জাতীয় স্মৃতিসৌধ ও জাতির পিতা বঙ্গবন্ধু শেখ মুজিবুর রহমানের প্রতিকৃতি এবং পেছনের অংশে নওগাঁর কুসুম্বা মসজিদের ছবি রয়েছে। সূত্র-যুগান্তর (পৃ. ২, ক. ৪) ইত্তেফাক (পৃ. ১৫, ক. ২) ফিন্যানশিয়াল এক্সপ্রেস (পৃ. ১, ক. ১) ডেইলি সান বিজনেস পাতা (পৃ. ১, ক. ১)।

১০। বাংলাদেশি পর্যটকদের ভারতে যাতায়াত সহজ করা হয়েছে

বন্দর ব্যবহারের নিয়ম সহজ করায় বাংলাদেশি পর্যটকদের ভারতে যাতায়াত সহজ হলো। গতকাল ৫ জুন সোমবার ঢাকায় ভারতীয় হাইকমিশনের এক সংবাদ বিজ্ঞপ্তিতে এ তথ্য জানানো হয়। এতদিন ভারতে ভিসার আবেদনে প্রবেশ ও প্রস্থানের ক্ষেত্রে পর্যটকদের ফরমে একটি বন্দরের কথা লিখতে হতো। সেই বন্দরের বাইরে আর কোনো বন্দর ব্যবহারের সুযোগ ছিল না। বিজ্ঞপ্তিতে বলা হয়, ২৪টি আন্তর্জাতিক বিমানবন্দর এবং হরিদাসপুর ও গেদের সমন্বিত চেকপোস্ট (আইসিপি) দিয়ে যাতায়াতকারী বাংলাদেশিদের ভিসায় প্রবেশ/প্রস্থান নিষেধাজ্ঞা অপসারণ করা হয়েছে। সূত্র-জনকণ্ঠ (পৃ. ১, ক. ২) সমকাল (পৃ. ৪, ক. ১) বাংলাদেশ টুডে (পৃ. ১, ক. ১) এশিয়ান এজ (পৃ. ১, ক. ১)।

১১। রাজধানীর শপিংমলে বিশেষ নিরাপত্তায় ডিএমপি

রাজধানীতে বড় বড় শপিংমলগুলোতে বিশেষ নিরাপত্তা ব্যবস্থা গ্রহণ করেছে ঢাকা মেট্রোপলিটন পুলিশ (ডিএমপি)। এছাড়াও ছিনতাই, পকেট কাটাসহ অপ্রীতিকর ঘটনা এড়াতে সিসিটিভি, আর্চওয়ে ও মেটাল ডিটেক্টরের মতো যন্ত্রপাতি স্থাপন করে বড় বড় শপিংমলে তৈরি করা হয়েছে কঠোর নিরাপত্তা বলয়। পবিত্র

রমজান ও আসন্ন ঈদকে সামনে রেখে ডিএমপির পক্ষ থেকে এ বিশেষ ব্যবস্থা নেওয়া হয়েছে। সূত্র-ইত্তেফাক (পৃ. ৩, ক. ৫) ইনকিলাব (শেষ. পৃ. ক. ৫)।

#### সম্পাদকীয়

- ক. **ইত্তেফাক** : ঢাকা-খুলনা মহাসড়কের রাজবাড়ী জেলা সদরের তিনটি রেলক্রসিং মৃত্যু ফাঁদে পরিণত হওয়ায় প্রতিদিনই দুর্ঘটনা ঘটায় উদ্বেগ প্রকাশ করে দুর্ঘটনা রোধে যথাযথ পদক্ষেপ নেওয়ার পাশাপাশি ব্যক্তিগত ও সামাজিক সচেতনতার ওপর গুরুত্বারোপ।
- খ. **সংবাদ, প্রথম আলো** : দেশের উপকূলীয় অঞ্চলে লবণাক্ততা বেড়ে যাওয়ায় কৃষিজমি কমে গিয়ে এ অঞ্চলের মানুষের জীবন-জীবিকায় মারাত্মক নেতিবাচক প্রভাব পড়ছে উল্লেখ করে এ পরিস্থিতিতে লবণসহিষ্ণু ফসল বা ধান চাষে উদ্যোগী হওয়ার সুপারিশ।
- গ. **যায়যায়দিন** : ঢাকা মহানগরীর আবাসিক ও কল-কারখানায় জ্বালানি গ্যাসের তীব্র সংকট চলার কথা উল্লেখ করে জনদুর্ভোগ লাঘবে গ্যাস সরবরাহ নির্বিলম্ব করার ওপর গুরুত্বারোপ।
- ঘ. **ইন্ডিপেনডেন্ট** : নৌপথে রূপপুর নিউক্লিয়ার পাওয়ার প্ল্যান্টের জন্য ভারী যন্ত্রপাতি পরিবহণে চট্টগ্রাম-মংলা সমুদ্র বন্দরের নৌপথ ড্রেজিং করে গভীরতা বাড়ানোসহ নিরাপদ চলাচলের জন্য এ নৌপথে নিমজ্জিত সব ধরনের অনাকাঙ্ক্ষিত বস্তু সরিয়ে ফেলার আহ্বান।
- ঙ. **ডেইলি সান** : কর্ণফুলী নদী দখল করে তীরে শতশত শিল্প কারখানা স্থাপনের দ্বারা নদীকে প্রায় মৃতবৎ করে ফেলার সর্বনাশা প্রচেষ্টা অতিক্রম প্রতিহতের দ্বারা নদীকে সুরক্ষার সুপারিশ।
- চ. **ডেইলি স্টার, নিউ নেশন** : পার্বত্য চট্টগ্রামের লংগদু এলাকার গৃহহারা লোকজনের স্বগৃহে ফিরে আসা নিরাপদ নির্বিলম্ব করাসহ পর্যাপ্ত ত্রাণ সামগ্রীর ব্যবস্থা করতে প্রশাসনকে প্রয়োজনীয় ব্যবস্থা নেওয়ার আহ্বান।
- ছ. **নিউ নেশন** : জনগণের দুর্ভোগ বিবেচনায় নিয়ে লেখার কাগজসহ অন্যান্য শিক্ষা উপকরণের ওপর থেকে উচ্চমাত্রার ভ্যাট প্রত্যাহার করার প্রত্যাশা করে সম্পাদকীয় প্রকাশ করেছে।

#### উপ-সম্পাদকীয়

যায়যায়দিন পত্রিকায় প্রকাশিত কলামে ভারত থেকে নদীর পানির ন্যায্য হিসাব পাওয়ার জন্য প্রয়োজনে আন্তর্জাতিক আদালতে যেতে হবে বলে উল্লেখ করা হয়েছে।

#### নিবন্ধ ও ফিচার

জনকণ্ঠ পত্রিকায় প্রকাশিত ‘পরিবেশ বিপর্যয় উত্তরণে চাই পরিবেশ পুলিশ’ শিরোনামের নিবন্ধে পরিবেশ পুলিশ গঠন করে বাংলাদেশের পরিবেশের দূষণ তথা প্রাকৃতিক পরিবেশের উন্নয়ন করতে হবে এবং সংশ্লিষ্ট সকল এজেন্সি বা প্রতিষ্ঠানকে একসাথে কাজ করতে হবে বলে অভিমত প্রকাশ করা হয়েছে।

#

ফাহিমা/শুকলা/মরজিনা/সাইদা/তানিয়া/২০১৭/৯.০০ ঘণ্টা